



ARTE BASILEA EXTREMIS (KUNSCHT WAS SUNSCHT)

Spaziere duur unsri scheeni Stadt
 isch allewyl sauglatt
 also mach i mi uff d'Sogge
 dasch gscheiter as dehaime hogge
 zämme mit mim liebe Schatz
 marschiere mer in Richtig Wettstaipatz
 Pletzlich gits mr aber z dängge
 i blyyb nämlich anere Schruube hängge
 no versuech i mi vo dääre Kuugele z befreye
 scho duet do ain energisch schreye
 – dien si das Kunschtwärgg nit zersteere –
 mues i vo dämm Heini heere
 rasch zien mer is vo däm Ort zrugge
 und seggle yber d Wettstaibrugg
 jetzt simmer aber rächt ins schwitze ko
 mits uff dr Brugg bliibe mer dorum sto
 zem regeneriere vo dr roote Biire
 trifft dr Blick zem Kunstmuseum fiire
 mer luege aber au aabe uf e Bach
 das isch au immer e feini Sach
 dä windet sich duur Basel wien e Wurm
 jezte fällt dr Blick uf e Minschterturm
 aber nai, was gseen mir denne do
 die dien jo bim Restauriere gar nit vorwärts ko
 ganz hinde uff em Minschter uf em letschte Zagge
 stoot jo tatsächlich e Baubaragge
 as Restaurator wurd ich das nit lässig finde
 dert uffe z klättere zem wächsle vo de Fingge
 aber nai, klärt mi denne ebber uff
 die Hytte isch nit wägge dämm do druff
 das isch Kunscht vomene Japaner, si Klaus
 und verurteilt mi grad zem Kunschtbanaus
 das isch d Stuube vom Ängel
 si unghooblete Bängel
 wurd si denn das nit beriere
 wenn dä dusse wär und miesti friere
 jä nu, scho widder han i ebbis miese leere
 wo me hytte nimme ka entbeere
 am Kunschtmuseum geen mer rasch verby
 sunscht laufe mer womeeglig derte au no dri
 scho sin mer uf em Platz vo de Bangge
 und widder hann i e guete Gedangge
 mer luege grad die ney Fasade a
 deert ääne vo dr SKA
 das isch e ganz e prächtigi Sach
 e andri Farb in jedem Fach
 i frog e Frau: – isch das e neyi Reklaame
 he nai! duet si mi ganz sträng ermaane
 dien si doch nit do dryber leschtre
 – das isch nämlich Kunscht vom Allerbeschte
 moralisch bin i jezte langsam uf de Wegge
 do gseen i uff dr andre Sytte am Egge
 scho widder esone Kuugele
 wo feschtstoot und nit duet ruugele
 i gsee grad as e Hund duet dra aane mache
 nit fescht, nai nur flissigi Sache
 i halt s Muul due nimme Reede
 dä duet sicher das Kunschtwärg no vereedle
 wytter geen mir Beidi
 durab in Richtig Seibi
 was isch in Basel loos
 fir mi isch d Fruschtration jezte groos
 will mer an jedem Egge
 mien neyi Kunscht entdegge
 mer halte a bim Tinguelybrunne
 heerlig lichtet dä do in der Sunne
 so, do mues mr niemer ebbis verzelle
 do weiss i nämlich was dä dar duet stelle
 d Fasnacht will är uns neecher bringe
 doch, das will is gfalle
 so wie z Basel alle
 wens pfyfft und ruest denn sin mir zwääg
 an de allerscheenschte drey Dääg
 jä, d Fasnacht isch unsri beschti Kunscht
 wenn nit die, was denn sunscht

*D'Ladäärne-Uustellig uff em Minschterplatz und
 d'Waage-und Requisite-Uustellig uff em Kasärneareal
 sind vom Mändig znacht, em 10. Meerze bis am
 Mittwoch demorge, em 12. Meerze, fir alli Bsuecher offe.*